

**KERATAN AKHBAR-AKHBAR TEMPATAN  
TARIKH: 15 OKTOBER 2013 (SELASA)**

<b>Bil</b>	<b>Tajuk</b>	<b>Akhbar</b>
1.	Gempa Bumi Kuat Melanda Mindanao;Tiada Ancaman Tsunami Kepada Malaysia	Bernamea.com
2.	Cuaca Mendung Dan Hujan Renyai Tidak Halang Kemeriahan Aidiladha	Bernamea.com
3.	Rain Expected in Several States	The Star
4.	Empat Negeri Diramal Hujan Pada Pagi Raya	Utusan Malaysia

BERITA ONLINE  
BERNAMA.COM  
TARIKH: 15 OKTOBER 2013 (SELASA)



## **Gempa Bumi Kuat Melanda Mindanao; Tiada Ancaman Tsunami Kepada Malaysia**

KUALA LUMPUR, 15 Okt (Bernama) -- Gempa bumi kuat berukuran 7.2 pada skala Richter melanda Mindanao, Filipina pada 8.12 pagi ini.

Namun, menurut [Jabatan Meteorologi Malaysia](#) dalam kenyataannya hari ini, gempa itu tidak membawa sebarang ancaman tsunami kepada Malaysia.

Pusat gempa bumi itu terletak kira-kira 31km di timur laut Tagbilaran City, Filipina dan 806km di timur laut Sandakan, Sabah.

-- BERNAMA



## **Cuaca Mendung Dan Hujan Renyai Tidak Halang Kemeriahan Aidiladha**

KUALA LUMPUR, 15 Okt (Bernama) -- Cuaca mendung dan hujan renyai di beberapa tempat di seluruh negara pada sebelah pagi hari ini tidak menghalang umat Islam untuk beramai-ramai menunaikan solat sunat Aidiladha sebelum melakukan ibadah korban.

Yang di-Pertuan Agong Tuanku Abdul Halim Mu'adzam Shah dan Raja Permaisuri Agong Tuanku Hajah Haminah menyertai kira-kira 15,000 umat Islam menunaikan solat sunat Aidiladha di Masjid Negara di sini.

Selesai menunaikan solat, Seri Paduka berdua berkenan beramah mesra dengan jemaah yang tidak melepaskan peluang untuk bersalaman dengan baginda berdua sebaik selesai khutbah Aidiladha.

Di PUTRAJAYA, Perdana Menteri Datuk Seri Najib Tun Razak dan Timbalan Perdana Menteri Tan Sri Muhyiddin Yassin menunaikan solat sunat Aidiladha di Masjid Putra.

Turut sama menunaikan solat sunat Aidiladha di masjid itu ialah bekas Perdana Menteri Tun Dr Mahathir Mohamad dan isterinya Tun Dr Siti Hasmah Mohd Ali.

Mereka bersama lebih 5,000 jemaah menunaikan solat sunat Aidiladha yang diimamkan oleh Imam Besar Masjid Putra Abdul Manaf Mat.

Majlis korban Perdana Putrajaya diadakan dengan 46 ekor lembu dikorbankan sebelum daging korban diagihkan Menteri Wilayah Persekutuan yang juga Anggota Parlimen Putrajaya Datuk Seri Adnan Tengku Mansor kepada warga Putrajaya.

Di SHAH ALAM, Sultan Selangor Sultan Sharafuddin Idris Shah menunaikan solat sunat Aidiladha di Masjid Negeri bersama kira-kira 10,000 anggota jemaah termasuk Menteri Besar Tan Sri Abdul Khalid Ibrahim.

Sebanyak 39 ekor lembu dikorbankan di perkarangan masjid negeri itu termasuk dua ekor sumbangan Sultan Selangor.

Di PERLIS, hujan di beberapa kawasan pada sebelah pagi di negeri itu tidak menghalang penduduknya menunaikan solat sunat Aidiladha.

Kerajaan negeri Perlis menyumbang 140 ekor lembu sempena Aidiladha tahun ini kepada wakil-wakil penduduk, jabatan kerajaan dan pertubuhan bukan kerajaan untuk korban.



Di PULAU PINANG, hujan lebat tidak menghalang kira-kira 1,000 jemaah untuk menunaikan solat sunat Aidiladha bersama Yang Dipertua Negeri Tun Abdul Rahman Abbas dan isteri Toh Puan Majimor Shariff di Masjid Negeri dengan diimamkan oleh Timbalan Imam Besar, Sya'bani Awang.

Khutbah disampaikan Imam Besar Sallahuiddin Ghazali.

Menurut ramalan [Jabatan Meteorologi Malaysia](#) semalam, hujan diramal berlaku di Kedah, Negeri Sembilan, Pulau Pinang dan Selangor pada pagi Aidiladha manakala Perak, Perlis, Putrajaya dan Kuala Lumpur pula diramalkan mendung.

Di KEDAH, Anggota Jemaah Pemangku Sultan Kedah, Tan Sri Tunku Sallehuiddin Sultan Badlishah menyertai ribuan umat Islam termasuk Menteri Besar Datuk Mukhriz Tun Dr Mahathir menunaikan solat sunat Aidiladha di Masjid Zahir, Alor Setar.

Hujan dilaporkan berlaku di beberapa tempat pada sebelah pagi di negeri itu.

Di TAWAU, Sabah pula majlis korban Ibu Pejabat Polis Daerah (IPD) Tawau terpaksa ditangguhkan sehingga esok berikutan keadaan cuaca yang tidak mengizinkan.

Ketua Polis Daerah Tawau ACP Awang Besar Dullah ketika dihubungi Bernama berkata upacara korban sepatutnya dilaksanakan selepas solat sunat Aidiladha di perkarangan IPD secara bergotong-royong tetapi ditangguh kerana hujan lebat.

Di TERENGGANU, Menteri Besar Datuk Seri Ahmad Said menyertai kira-kira 2,000 umat Islam menunaikan solat sunat Aidiladha di Masjid Al-Muktafi Billah Shah, Kuala Terengganu.

Cuaca cerah melancarkan majlis-majlis korban yang berlangsung di negeri itu.

Pengarah Jabatan Veterinar Negeri Terengganu Dr Marzuki Zakaria menasihatkan orang ramai yang hendak melakukan ibadah korban supaya menjaga kebersihan serta mematuhi peraturan yang ditetapkan bagi mengelak wabak penyakit kuku dan mulut.

Di KELANTAN, Sultan Kelantan Sultan Muhammad V menunaikan solat sunat Aidiladha bersama umat Islam di Masjid Muhammadi di Kota Baharu. Turut sama berangkat Tengku Mahkota Kelantan Tengku Muhammad Faiz Petra.

Turut sama menunaikan solat di masjid itu ialah Menteri Besar Kelantan Datuk Ahmad Yakob dan Menteri Perdagangan Antarabangsa dan Industri Datuk Seri Mustapa Mohamed.

Cuaca di negeri itu dilaporkan cerah dan memudahkan umat Islam melaksanakan ibadah korban.

Di JOHOR, Sultan Johor Sultan Ibrahim menunaikan solat sunat Aidiladha di Masjid Pasir Pelangi, Johor Baharu yang turut disertai anakanda-anakanda baginda.

Turut sama menunaikan solat Aidiladha di masjid itu Menteri Besar Datuk Seri Mohamed Khaled Nordin.

Di PERAK, Pemangku Raja Perak, Raja Dr Nazrin Shah menunaikan solat sunat Aidiladha bersama lebih 2,000 jemaah di Masjid Sultan Azlan Shah di Jalan Raja Muda Musa, Ipoh.

Baginda diiringi Menteri Besar Datuk Seri Dr Zambry Abdul Kadir.

Tahun ini sebanyak 341 ternakan korban bernilai RM1.02 juta disumbangkan pelbagai agensi dan badan berkanun di Perak untuk program tahunan Korban Perdana untuk diagihkan kepada setiap kawasan Dewan Undangan Negeri (DUN).

Di PAHANG, Sultan Pahang Sultan Ahmad Shah diiringi Menteri Besar Datuk Seri Adnan Yaakob menunaikan solat sunat Aidiladha bersama ribuan umat Islam di Masjid Negeri Sultan Abu Bakar 1, Kuantan.

Sementara itu, Pengerusi Biro Agama Umno Bahagian Pekan, Datuk Ariffin Daud berkata sebanyak 303 ekor lembu diagihkan kepada masjid dan surau di kawasan Parlimen Pekan untuk dikorbankan.

Beliau berkata sebanyak tujuh ekor lembu sumbangan peribadi Perdana Menteri Datuk Seri Najib Tun Razak akan dikorbankan di kawasan kediaman Perdana Menteri di Pekan, esok.

Di NEGERI SEMBILAN, Yang Dipertuan Besar Negeri Sembilan Tuanku Muhriz Tuanku Munawir dan Tunku Ampuan Besar Tuanku Aishah Rohani Tengku Besar Mahmud berkenan menunaikan solat sunat Aidiladha bersama kira-kira 1,000 jemaah di Masjid Diraja Tuanku Munawir, Seri Menanti.

Sementara itu, Menteri Besar Datuk Seri Mohamad Hasan menunaikan solat sunat Aidiladha di kampung halamannya di Rantau, Rembau bersama kira-kira 1,000 jemaah di Masjid Jamek Rantau.

Di MELAKA, Yang Dipertua Negeri Melaka Tun Mohd Khalil Yaakob serta Ketua Menteri Datuk Seri Idris Haron menyertai kira-kira 7,000 jemaah menunaikan solat sunat Aidiladha di Masjid Al-Azim di Bukit Palah.

Sebanyak 14 ekor lembu dikorbankan di perkarangan masjid itu sebelum daging korban diagihkan Mohd Khalil kepada orang ramai.

Di LABUAN, 40 ekor lembu diagihkan di kesemua 27 kampung dan persatuan mewakili umat Islam di pulau itu bagi melaksanakan ibadah korban.

Anggota Parlimen Labuan Rosman Isli berkata lembu-lembu itu disumbangkan melalui peruntukan Parlimen Labuan, Yayasan Wilayah Persekutuan, Persatuan Pengimport dan Peniaga Kenderaan Melayu Malaysia (Pekema) dan orang perseorangan.

Di SARAWAK, Ketua Menteri Tan Sri Abdul Taib Mahmud menunaikan solat sunat Aidiladha di Masjid Jamek Negeri Sarawak, Petra Jaya.

Turut sama barisan kabinet negeri antaranya Menteri Perumahan dan Pelancongan Datuk Amar Abang Johari Tun Openg, Menteri Perancangan Sumber dan Alam Sekitar Datuk Amar Awang Tengah Ali Hassan serta Speaker Dewan Undangan Negeri Sarawak Datuk Amar Mohd Asfia Awang Nassar.

Tidak ketinggalan mengadakan ibadah korban warga Divisyen Pertama Kem Penrissen, Batu 8, dekat Kuching yang dihadiri Panglima Divisyen Pertama Infantri Malaysia, Leftenan Jeneral Datuk Mohd Zaki Mokhtar.

Sebanyak 44 ekor lembu dan tujuh ekor kambing diagihkan di laman kem Markas Divisyen Pertama Infantri Malaysia di seluruh negeri bagi melaksanakan ibadah korban tahun ini.

Sementara itu, Ketua Menteri Sabah Datuk Seri Musa Aman dan isteri Datin Seri Faridah Tussin menyambut Aidiladha di Sandakan.

Musa yang juga Anggota Dewan Undangan Negeri Sungai Sibuga menyertai umat Islam menunaikan solat sunat Aidiladha di masjid Sungai Kayu, Batu 7, Jalan Lapangan Terbang.

-- BERNAMA



**KERATAN AKHBAR  
THE STAR (NATION) : MUKA SURAT 02  
TARIKH: 15 OKTOBER 2013 (SELASA)**

## **Rain expected in several states**

**KUALA LUMPUR:** Rain is expected to fall over Kedah, Negri Sembilan, Penang and Selangor this morning.

According to the **Meteorological Department's website**, Perak, Perlis, Putrajaya and Kuala Lumpur are expected to be cloudy while no rainfall has been forecast in other states, including Sabah and Sarawak, in the morning.

Thunderstorms are expected in the evening in Johor, Kelantan, Negri Sembilan, Sarawak, Selangor

and Terengganu.

Rainfall is set to hit Kuala Lumpur, Kedah, Malacca, Penang, Perak, Perlis, Putrajaya and Sabah this evening. Labuan will experience gloomy skies.

At night, rain is expected in Johor, Labuan, Sabah, Sarawak and Terengganu, with overcast clouds in Kedah and Penang, while good weather is forecast in Kuala Lumpur, Kelantan, Malacca, Negri Sembilan, Pahang, Perak, Perlis, Putrajaya and Selangor. — Bernama

**KERATAN AKHBAR**  
**UTUSAN MALAYSIA (DALAM NEGERI) : MUKA SURAT 03**  
**TARIKH: 15 OKTOBER 2013 (SELASA)**

Empat negeri  
diramal  
hujan pada  
pagi raya

KUALA LUMPUR, 14 Okt - Hujan diramal berlaku di Kedah, Negeri Sembilan, Pulau Pinang dan Selangor pada pagi Aidiladha esok.

Menurut portal **Jabatan Meteorologi Malaysia** hari ini cuaca di Perak, Perlis, Putrajaya dan Kuala Lumpur pula diramal mendung manakala negeri-negeri lain termasuk Sabah dan Sarawak tiada hujan pada sebelah pagi.

Pada sebelah petang, ribut petir dijangka berlaku di Johor, Kelantan, Negeri Sembilan, Sarawak, Selangor dan Terengganu.

Hujan pula diramal di Kuala Lumpur, Kedah, Melaka, Pulau Pinang, Perak, Perlis, Putrajaya dan Sabah pada sebelah petang, manakala cuaca mendung di Labuan.

Pada sebelah malam, Johor, Labuan, Sabah, Sarawak, Terengganu dijangka mengalami hujan, sementara cuaca mendung di Kedah dan Pulau Pinang manakala cuaca di Kuala Lumpur, Kelantan, Melaka, Negeri Sembilan, Pahang, Perak, Perlis, Putrajaya dan Selangor diramal baik pada sebelah malam. - BERNAMA